



DE ISTÀ OGNI BECO FA LATE, DE INVERNO GNANCA LE BONE VACHE

Pararìa che el caldo no ghesse proprio tanti difeti, a dar-ghe reta a ste do righete.

Va ben, el caldo te fa s-ciopare, te sùi come na bestia, le zenzale le te mete in crose, la mojere la vole 'ndare al mare e ti te gavarissi voja de fresco e de montagna, i fiòi no xe a scuola e i fa matina... tute le sere, e... penso che basta cussì!

I nostri veci, par via che de inverno no ghe jera i termosi-funi in casa e par scaldarse i dovéa 'ndare in stala, no i vedéa l'ora che rivesse l'istà. Nantro bel proverbio el dise: beato l'istà, co tuti i zimesi e i polze che 'l ga e mi no sò che torto darghe, no fusse altro par via del fato che de istà la jornata la se gode depi.

L'inverno el jera visto male par tante altre robe, oltre che pa 'l fredo, parché no ghe xe racolto in campagna, le galine le fa manco ovi, a volte gnente, vien scuro a le quattro...

Par dessora, quando che la television la jera oncora di-stante e la luce la jera quela de na candela, ai nostri veci ghe tocava 'ndare in leto co le galine e in leto... se svejava el galo, cussì che el scuro el deventava el pare de na quindesena de fiòi...

El confronto el podaría continuare fin a dopo la copertina de Quattro Ciàcoe, ma basta el proverbio, come al solito, par dare el sugo che ghe serve al discorso.

Me piase assè la bona grazia del nostro nono, che par convìnzarne de le so rason e parlare ben de l'istà, el ga cavà late anca dal cavaron...

SIA DE INVERNO, SIA DE ISTÀ, TABARO E ONBRELA MAI A CA'

Uno che ghe crede poco a la fortuna, al caso, a la pos-sibilità che le robe le possa anca 'ndare ben, calche volta: eco chi che ga da èssare stà que lo che ga pensà sto proverbio.

Sì, parché consiliare de portarse drio l'onbrela de istà, va ben, ma el tabaro me pare on fià fora de posto.

Za mi a go da combàtare co me mojere che quando ca 'ndemo in montagna in lujo la me fa portare la tabarina par la piova, onbrela picola e grande, capuci vari, oltre che na tuta pe-santina e una liziera e, no se sa mai che la possa servire, anca la jacheta de pena de oca.

A ela sto proverbio me sa ca ghe lo tegno sconto!

A ogni modo, so ste racomandazion ghe xe na forma de pru-denza da tegnere in conto, prima de métarse a rìdarghe des-sora. De sti tempi, paraltro, el clima el fa el mato pi del solito, co tanto de tronbe de aria anca da le nostre parte, che no le xe proprio de casa!

Xe vero che col vissinelo (la xe la tronba de aria in dialeto) l'onbrela la fa da ridare, parché in du secundi te restarissi solo co manego e feri, ma xe vero anca che se tempesta, dopo xe frescheto e alora no digo el tabaro, ma na velada liziera no la farìa tanto male.

Me fiòi, ch'i ga 'torno trent'ani, ghe vegnarìa da ridare, solo al pensiero del tabaro (ciamàndolo K.Way i capirìa mèjo), ma noantri pi 'vanti col conto de l'anagrafe, xe mèjo ca pensemo anca a tabaro e onbrela. Senza esajerare!